

## Ricotta cu lu sero e pani sminuzzatu

Quann'era nicu, cu me matri,  
certi matini, ivamu âccattari  
la ricotta cu lu sero. Mi piaciva vîdiri 'ntornu  
a lu casdaruni tanti cristiani  
c'aspittàvanu c'acchianava la ricotta,  
bedda bianca, casda-casda e cotta.

Iu cu li cazi curti,  
un magliuneddu di lana,  
ca era prima di me frati,  
cu li manuzzi 'nsacchetta,  
li spadduzzi arrunchiati,  
mi sintiva tutti cosi gilati.

Tra iddi fimmini, sparlittàvanu,  
cu diciva ca donna Sarina aviva  
la caputa lorda e ammaccata,  
cu diciva ca la 'ngnura Tresa  
s'arricampà senza facci lavata,  
e ccu avia la vistina sciardata.

Certi voti parlàvanu a bassa  
vuci pi nun mi fari sèntiri.  
Parlàvanu di la muglieri  
di lu dutturi ca cci faciva  
li corna a ddu fissa di lu maritu  
cu lu figliu di lu nutaru Territu.

Senza vuliri, mi 'ntrumisi dicennu:  
«Mi pariva onesta la signura!».  
Mancu finivu di dillu, m'arrivà  
'na masciddata di me matri  
narrè lu cozzu ca mi fici stunari.  
Mi dissi: «zzittuti, nun t'ammiscari».

Ognuna avia la so caputa, cu purtava  
la tazza cu lu pani ggìa sminuzzatu,  
cu purtava pignati e pignateddi,  
cu la vuliva sparti, di una la ricotta  
e di l'atra cci vuliva lu sero,  
chissu chi vi cuntù è tuttu veru.

Comu acchianava, tutti vulivanu èssiri  
allistuti pi prima, cu diciva: «ass'allesti  
a mia ca àiu a me maritu malatu»,  
cu si 'nn'avia agghiri a travagliari,  
tutti si stringìvanu a lu casdaruni,  
scantànnusi di ristari addiuni.

Donna Maria, vistuta tutta di niuru,  
fimmina tutta d'un pezzu, quantu  
aviva li spaddi, aviva scianchi e pettu.  
Cu la scumera 'mmanu, pigliava  
la ricotta, mmezzu tutta dda fudda,  
fina-fina, a sfoglia di cipudda.

Iunti dintra, me matri preparava  
li tazzi, cci sminuzzava lu pani  
di lu iornu prima, 'ncapu cci mittiva  
ancora casda, la ricotta cu lu sero,  
tutta la famiglia faciva colazione,  
pi natri era festa, pariva l'Ascenzioni.

Tannu, la ricotta cu lu sero,  
si manciava pi pitittu,  
nni inchivamu la panza  
e nni faciva prufittu,  
ora 'nveci s'accatta sulu pi piaciri,  
si mància a scopu, pi megliu iri.

2011 Giuseppe Cardella